

EXITOSO FESTIVAL DI CANTO DI "DE TRUPIALEN"

Tin hopi talento den e grupo aki!!!



** Trupialen den decada 60 y 70 tabata un di e Clubnan cu a brinda hopi hobennan e oportunidad pa por a desaroya nan mes sea musicalmente o ariba tereno di teatro i tur loke tin di haber cu nos cultura.

E nomber oficial di e grupo ta "Culturele Juegdgroep De Trupialen". Bao guia di nan fundador Frere Alexius, Trupialen a cosecha hopi exito ariba tereno cultural.

Hopi di nos musiconan local a hanja nan formacion serca

"De Trupialen". Tambe ariba tereno teatral Trupialen a produci hopi artistanan cu a deleita e publico hopi vez cu nan presentacionnan di un nivel hopi halto mes.

Tambe nos mes yiunan di tera despues di tempo a bin ta yuda Frerenan pa nos hobennan tin un pasatempo sano i educativo. Respet i disciplina ta e fundeshi pa por alcanza e exito cu Trupialen semper a cosecha, den decada 80, pa falta di lidernan y tambe circunstancia cu a cambia no a

tende mucho mas di De Trupialen.

Pa fin di 1990 a dicidi di forma un directiva cua a haci e tramitenan pa Trupialen por bay funciona ariba un base regular. E directiva a worde forma pa Edgar Boekhoudt (Presidente), Emile Herde (Vice Presidente), Sonia Herde (Tesorera), Rene Herde (1 Secretario), Vicky Booi (2 Secretario i P.R.), Bill Tromp (Comisario), Elmer Pieters y Mario Tromp como lidernan di e grupo.



Nan a bira un organisacion ariba nan mes, y nan a traha nan propio statutan. Antes nan tabata pertenece na Stichting Juegdzorg De La Salle.

Dia 27 di September 1991 nan a cuminsa cu un grupo di 41 mucha di edad entre 9 i 10 aña. **Do Re Mi Fa Sol La Si Do**, a resona den Club atrobe.

E lesnan di canto ta bao guia di Lem Pieters i Mario Tromp. Nan prome aparicion den publico tabata dia 2 di November, dia di Santa Cecilia, den Misa di San Francisco. **Santa Cecilia ta patrona di De Trupialen.**

Despues a sigui cu preparacionnan di Pasco di Nacemento. E grupo a yega asina leu cu nan a canta un Misa completo y canticanan di Pasco pa conmemora nacemento di e Niño Hesus.

Januari lesnan a continua i medio Januari e muchanan a hanja un workshop di Sra. Catherine Provence cu ta un profesional di canto encuancto technicanan di uso di stem.

Februari i Maart preparacionnan tabata fiha ariba celebracion di nos Himno i Bandera unda nos fundador Frere Alexius tabata huesped di honor di Gobierno di Aruba.

Na luna di April De Trupialen a presenta den e show cu Van Dorp a organisa en conexion cu nan 25 aña di existencia.

For di December 1991 te cu Juni 1992 De Trupialen a canta Misa un vez pa luna i tin luna hasta dos vez. E parti spiritual ta hunga un rol importante den e organisacion i nan ta trata di educa e muchanan ariba e aspecto aki.

Pa dia di Mama i dia di Tata a prepara e muchanan pa a canta un bunita Misa pa e Mama i Tatanan.

Na luna di Mei a cuminsa

prepara e muchanan pa e festival di canto. Tene e festival di canto ariba base regular ta un tradicion di De Trupialen.

Durante e festival e muchanan por a demostra con leuw nan a desaroya nan talentonan di canto, y nan oido pa musica. Tambe nan a hanja e oportunidad di actua dilanti un publico i kita asina un poco di e miedo pa publick. Mayornan por a hanja un bista kico e organisacion ta haci cu e muchanan durante ensayo i con e muchanan ta progresa den musica i canto i expresion teatral.

E festival di canto aki ta e culminacion pa cera e temporada prome cu vacacion di school.

De Trupialen tin plannan pa presenta e show musical aki pa publico asina mescos cu den decada 60 i 70 nan por duna nan contribucion na formacion di nos Juventud.

Na e festival a participa tur e muchanan 33 en total, 20 a participa individualmente i e otro 13 nan a forma e coro.

Tur e participantenan a ricibi un certificado di participacion. Tambe a presenta un obra chikito cu tin como titulo: Cumindamento di Compa Coroto, bao di guia di Bill Tromp.

E banda cu a companja e muchanan unda cu nan bay canta ta consisti di miembronan di De Trupialen. Nan ta Hubert Booi, Roque Pieters, Tirso Tromp, Dennis Zepfenfeldt, Maikin Pourrier, Robby Hart, Jacobo Robert, Stanley Pourrier y Mario Tromp.

Durante e festival di canto aki por a nota un entusiasmo grandi entre e muchanan pa ser un cantante den futuro, y mirando e nivel halto di canto di algun di e muchanan aki di De Trupialen, Aruba sigur lo bay conta cu un **Super Star** den futuro !!!

